

# INUIT ATAQATIGIIT

## INATSISARTUNI



Nuuk, 27. februar 2014

Inatsisartut Suleriaasianni § 37 naapertorlugu Naalackersuisunut imaattunik apeqquteqarpunga.

(Inatsisartuni ilaasortaq Harald Bianco, Inuit Ataqatigiit)

### Apeqqut:

- **Naalackersuisut Tunumi nannuttassat amerlissamaarpat?**

### Tungavilersuut:

Siullermik 2010-mi § 37-kkut assinganik apeqquteqaateqarnikuuvunga, malunnaatilimmik nannut amerliartutut isikkoqarmata. Taamani Naalackersuisuusut Tunumi pisassat qulinik qaffannikuaat, tassa Ittoqqortoormiuni tallimat kiisalu Tasiilami aamma tallimat.

2009-mili Inatsisartuni ilaasortanngorninnili Tunumi nannunik kisitsinissaq apeqqutigiuartuarnikuuara, kingullermik 2012-imi apeqqutigigakku neriorsorneqarpugut, 2013-imi Tunumi nannunik kisitsisoqassasoq, kisiilli aamma tamanna pinngilaq. Tunumi nannut pisarineqartartut amerlissanersut imaluunniit ikilissanersut kisitsereernerup takutikkumaasammagit, taammaattoq Tunumi nannunik kisitsisoqarnissaa assut kissaatiginaraluarpoq.

Nannut amerliartutut isikkoqarsinnarput; siornatigut tungavilersuutigisara suli atuuttut ilagissagaat qularnangilaq. Tassa avannatsinni kujatitsinnilu piniariartarfiit 1990-ip qiteqqunneranili orninneqassaartut, tassa ukiuni 20-nngulersuni peqquataaqataalluinnaasasut, piffinni taakkunani nannut erniortut amerliartuinnarnissaannik. Soorluttaaq eqqaanikugiga, eqqatsinnut nannut takkuttartut akulikilliartuinnartut piarallit takkusimaartalerput. Soorlu ippassigami illoqarfitta akiani nanoq marlunnik piaralik iniliorluni ullut 14-it miss. akitsinneerujoorpoq, sikumi aalisartut qanittuanni soqutigisaqarpasigani. Kitinnguatsinni kangerlorujussuup Sermiliup qinngua-tungaani ippassaani tappavaniittut oqaatigivaat, nannut ataatsikkut arfineq marlut miss. isiginnaarsimallugit. Kangerluit sikusarnerugalarmata taamaaqqajannigilaq. Nunaqarfittavut ilanngullugit ullut tamakkingajallugit nannunik isiginnaartoqartarpoq, soorluttaaq radio-kkut Ittoqqortoormiiniit tutsiuttartut oqaatigisaraat, ullut tamarluinnaasa nannunik isiginnaartoqartarpoq.

Pinngortitaleriffiup peqquataatittagaa (suli misissuinikuunnginnamik uppernarsaatissaqanngitsoq) sikorsuit ingerlaarnerisa allanngornerat, taamatullu nerisassakilliulernermik peqquteqarsinnaasorisat maani tamana ilimaginngilarput. Sikorsuit qangarnit seqummakunngornerusut nalunngilarput, kisiat takkussimaarfii atitussusiilu allanngungaannigilaq. Tamanna sap. ak. tamaasa malinnaaffigisinnaavarput DMI-p sikut assingi takutittuarmagit. Nannut pisarineqartartut tamatigut pualasuujusarput, nerisassakilliorsimanissaannik uppernarsaatissaqannigilaq.

Kingullermik nanoq piaralik illoqarfiup iluanut pisoq, maaniinnikut nalussanngilaat arsaattarfik illumut qaangerlugu aqqusinermut appakaatilersoq politiit qimaatippaat. Tassa nannut illoqarfimmuut suli aamma qalliartorput, akulikilliartorlutillu.

Nannut amerlangaarmata pisarinissaallu ajornanngingaarmat, ukiup aallartinnerani nannut apissiminniit anialernerisa (februar) nalaanniit qaammatit marluk pingasulluunniit ingerlernerinik pisassat nungunneqartarput. Ukiup sinnerani takuneqartartorpassuit isiginnaarneqaannartarlutik.

Piniartut inuuniarnerminnik kiisalu amianik akissarsiuteqarnerminni nannut tapertarilluinnarmassuk, oqaatigineqareersutullu amerliartornerat malunnarluinnarmat, Naalakkersuisut pisassanik minnerpaamik Tasiilamut 10-nik kiisalu Ittoqqortoormiunut aamma 10-nik qaffaagaluarpata, nannut nungutaanissaannut navianaateqanngilluinnassasoq isumaqarnarpoq.